


薇
天
集



薇天集卷之二

目次

代言文

日講官左春坊左諭德兼翰林院侍讀掌

太司經局事文震孟并妻誥命一道

前官父母誥命一道

南京太僕寺卿楊覲光誥命一道

翰林院提督四夷館太常寺少卿解學龍

誥命一道

太常寺少卿鹿善繼 誥命一道

前官父母 誥命一道

太常寺少卿孫之益 誥命一道

翰林院簡討徐汧 勅命一道

前官母 勅命一道

禮科都給事中孫紹統 勅命一道

禮科給事中張鏡心 勅命一道

河南道監察御史羅萬爵 勅命一道

吏部考功清吏司郎中孫必顯并妻 誥

命一道

前官父母 誥命一道

吏部文選清吏司員外郎陸康稷并妻

前誥命一道

前官父母 誥命一道

吏部文選清吏司主事喬若雯 勅命一

吏道

吏部考功清吏司主事楊伸 勅命一道

前官父 勅命一道

吏部驗封清吏司主事王杼 勅命一道

戶部江西清吏司主事陳觀陽 勅命一

道

前官父 勅命一道

禮部祠祭清吏司主事劉繼吳 勅命一

道

工部虞衡清吏司主事黎元寬 勅命一

道

前官父 誥命一道

南京兵部車駕清吏司員外郎李衷純

誥命一道

光祿寺珍羞署監事瞿式耒父 誥命一

道

詹事府錄事王鑑父 勅命一道

整飭紫荆等關保定兵備山東按察司副

使沈槃 誥命一道

河南開封府祥符縣知縣宋琮 勅命一

道

目次 畢

徽天集卷之二

代言臣姚希孟撰

日講官左春坊左諭德兼翰林院侍講掌

司經局事文震孟

制曰國家高置禁林弘收儒彥其有虎榜名先

于粉壁鳳鳴嚮徹于丹青正譽命之方新宜

對颺而勿替爾日講官左春坊左諭德兼翰

林院侍講掌司經局事文震孟家風綿亘門
闕清華昔有植孤忠于衰宋者實遠承夫瓜
瓞又有膺薦舉于
聖朝者復近沛其醴源香浸墨池化作鳧鷖之
藻芳餘德種呈為鸞鷟之祥當
先皇帝臚唱軒墀余冲人深居邃密驩聲雷奮
共言日映重瞳喜氣霞蒸何啻雲開五色惟

素抱沂公温飽之耻能仰符皇佑忠孝之求
書奏竹林董子揮賈生之涕經翻藜火更生
蒙石顯之讒比厨俊之株連幾網箝之羅織
幸免雉罹之釁茲當龍見之期亟促鋒車徵
還闕院朝倚橫經之席人比甘盤夕登視草
之堂文摹君奭花磚視影將開履道于昇平
郢水合醪更效和羹于醴格茲用覃恩階爾

為奉直大夫錫之誥命昔有殿頭之選嘗聞
仗下之鳴雖德配醇儒而功虛輔世即宋朝
尊賢敬士之報賴爾家鞠躬盡瘁之臣惜此
楨梁遭時板蕩母言復始尚其舍旃茲泰道
之方隆更輿情之共屬惟是斂寒銛于百鍊
之後作聖代之良臣調元氣于六符之年稱
盛世之君子昭爾明德服此訓詞

妻

制曰禮嚴攸遂徒以是議為功道貴代終又以
無成著戒所以閨閫之德幽邈希傳即欲播
其音徽安施裾拾惟攷良人之百行庶占女
士之一班爾陸氏乃左春坊左諭德兼翰林
院侍講文震孟之妻產自儒宗媿茲懿彥曩
酒漿以陳饋時寒燠而獻衣豈獨佳兒婉戀

鷄鳴之寢兼茲孝婦扶携鳩杖之旁媿宜備
焉稱之瀆矣惟是春官彙征之錄司封貶慶
之章朕留意覽觀攷其存均夫之擢第年甫
踰強而白首懷人青閨徒夢溫臺常掩明月
塊而無規梁案生塵流雲漸而未續將靜琴
之難再抑故劍之堪憐又或茲筐共集于桑
苞膠蔭叢生夫蔗本惟盛德有黃裳之報故

旌心無白水之寒繫爾寬仁可佐騶虞而揚
化表茲淑惠宜偕暈翟以分輝茲用覃恩贈
爾為宜人錫之誥命於戲在昔往牒不乏貞
夫人知宋弘之謝湖陽而不知馮京之辭堯
佐以茲雁偶之孤特亦作龍頭之美談何期
忠孝一家更能仁義兩盡念亡妻而始終無
負必能上報君恩稱丈夫而富貴不淫豈至

下同婦道資爾同德同心之彥為余有國有
家之光綸渙初頒幽明合聽

父母

制曰作忠有道錫類為先故雖邁種單門奮身
圭竇尚欲問雲根于膚合尋海氣于涓派而
况素卷初雲青箱奕葉者序爾原任衛輝府
同知文元發乃左春坊左諭德翰林院侍講

文震孟之父學授園橋名成拔幟爾曾祖以
死勤事西堂傳墮淚之碑爾王父不家于喪
東甌擬投金之瀨父播世芬于越地復稱民
牧于鄰封尉薦方高仁政有雉雠之異秉心
不競次遷得鴻漸之干斂長轡于康莊非關
嵇懶謝津途之响沫頗避規塵所以身肩洛
社之英望擬太丘之長閨門肅于朝典每敦

顏氏家規追琢妙若天章端賴謝公身教故
能頃麓遶膝觴茗怡顏萃百順于萊班吳閭
哆為瑞事傲三公于畫繡遠近挹其祥風後
以春秋得元命之苞實從孝經占援神之契
恨雷轟九地杳長夜之無聞然霞冠千英應
下泉之含笑至若卿雲出岫便成吐氣長虹
琪樹方葩已作凌霜鐵幹雖繇性植亦稟庭

趨可不彰以綸絲表其弓冶茲用覃恩贈爾
為奉直大夫左春坊左諭德兼翰林院侍講
錫之誥命於戲昔蘇洵學兼孟韓啓端明之
蓮炬若王祐名聞周漢基文正之槐堂維筆
塚對峙乎墨莊猶是河源導漢必德馨遠迎
乎善氣乃能岳降生申溯厥名賢勉其後裔
制曰事父猶天無朱明玄英之異奉母若地有

濮鉛祝粟之分然戴履維均厚高罔間譬後
母而懷育閔之德豈前母而忘媿麗之尊爾
原贈孺人彭氏乃左春坊左諭德兼翰林院
侍講文震孟之前母父曰彭年名著布衣高
士夫為元發又稱待詔聞孫方其卮醴施枨
椒花獻頌檠燈夜永金鍼共班管爭拈衡宇
春深帶草共錦紋相亂而篤守繫袞之訓能

恪供井臼之勞椎布自甘縞綦常敝值瓶爨
之告罄糜借鼠糧執戾屨以供炊羹調駕慕
凡諸壺行載在綸章獨惜其螽羽未繩燕楸
希效以茲縈緒迄乎賈身彩散青鸞啓玉筠
之娛笑膠尋翠鳳感張說之投懷今爾子已
獻作邦珎呈為世瑞徽音邈矣是為無貌於
心伉儷儼然貴在求端於始思後先而齊霈

辛大慶之遐敷茲用覃恩贈爾為宜人錫之
誥命於戲昔日齊眉未老已懷破鏡之悲此
時携手同歸可免向隅之感無子有子玉樹
永抱其連枝雖亡不亡金莖自堅于並蒂光
榮非借黼黻攸同

制曰石為玉胎乃玉剖而石碎川為珠孕乃珠
現而川枯一氣乖違五行蚪錯又有驥子失

渥注之產鷓雛迷丹穴之巢似天道之無親
在人倫而思報爾原贈孺人周氏乃左春坊
左諭德兼翰林院侍講文震孟之母考其先
世蟬聯之系嘗作

肅呈螭邸之臣附翼攀鱗可駕羣公而直上辭
熏避灼竟全晚節於今終以是名門啓茲閨
秀作閎儒之敵體曜旣從鸞守喆配之芳規

樂還授玠因鳧鳥之飛渡挽鹿車以相將萍
藻是共爰配桐鄉之祀琴瑟既好常聞單父
之絃更當覩珠樹之春葩飽瑤蓂于秋實云
何脆折遽爾凋萎今爾子玉陞傳宣金門侍
直而北堂動毛義之感東方無穎考之遺子
固增其痛推余亦為之悼嘆茲用覃恩贈爾
為宜人錫之誥命於戲養堂欲闢難留衾篋

之殘溫板輿可迎已斷柘椽之餘氣使爾身
而長在猶遠遜夫耄年雖至今存未為遐也
去日滋久謂之何哉欲伸二人明發之懷勉
圖三立不朽之計賁榮哀于下土聊慰永言
祈忠孝之格天斯昭罔極

南京太僕寺卿楊覲光

制曰朕讀問命言侍御僕從罔非正人以旦夕
承弼厥辟然則掌輿馬而帥橐泉駒駘之屬
者於主德故相關也自

文皇帝改法駕而北留都以藏
孝陵衣冠警蹕聲窈矣而和鑾中采齊如古之
頌祖惠以諷者非正人弗居焉爾南京太僕

稿天集 卷二 十一
寺卿楊覲光生在齊魯禮義之鄉能知夙命
果因之理參靈抱慧良非偶然辭垢攬芳殆
繇天授既因輜車之閱歷稔探風會之盛衰
屬公主帥於卧關也自
皇祖之季年多柄人而執命滋有言之桃李憎
自媚之蒞蘭置爾閑曹屏之津路爾則高而
忘競楚人原可失弓智以養恬塞翁何必得

馬况一時踈迹之彥有它年俊及之英密爾
頃荒占其臭味既司禮樂神人之寄益秉清
明齋被之衷至游閱外藩數載常驅隼旗而
歸依有道此生欣傍龍門豈特琮度璜聲宜
作明庭琛寶抑且虹梁鼇柱堪為濟世舟航
暫泣酮司還耽烏養蓋其消歸惟孝友之性
詎肯沉酣在圭組之中是謂正人克參贊御

然留都非揚鑣之地則僕臣希扞牧之期鼎
遠龍髯馭

高皇而無路春生鳳輦觀君子之來朝茲用覃
恩階爾為中大夫錫之誥命翳爾秉心淵塞
宜孳駉牝以如雲若念王事馳驅還共驂騶
而逐電佇須特簡且服新綸

翰林院提督四夷館太常寺少卿解學龍

制曰昔有通五方之音者東曰寄南曰象西曰
狄鞮北曰譯羽民裸國各貢其聲以合于王
會彼固異類也猶為之宣鬱而導滯况士有
風議野有譏彈可不採以入告故周禮有懷
方合方氏疑掌輶鐸者充之爾翰林院提督
四夷館太常寺少卿解學龍射策蜚英本儀

庭之鸞鷲引經斷獄類棲棘之鸞鳳晉箴尹
以弼違同正言而獻諍人歸薇省天子賴有
諫臣紙落藤牋聖朝豈無闕事韓魏公痠心
治亂得諫草七千章呂希哲感首奸回為法
筵第一義以此致信信之狂喙履岌岌之驚
絃幸

天佑貞臣未有北寺黃門之袖而

帝開新命仍還東華青瑣之班乃松柏洊歷乎
嚴寒而姜桂彌徵其馥烈如諸臣多戒心乎
往事惟爾輩能競爽於新章真夕秀之前茅
稱朝陽之領袖今移館職有類閒曹然西旅
特燹太保著惟貞之訓南越獻雉姬公有弗
享之謙况乎學在四夷師郟子而徵九扈豈
獨音通百獸藉介葛以問三犧總是耳目之

官佇需喉舌之任茲用新恩階爾為中憲大
夫錫之誥命朕之慶馳頗不假易獨自省臺
擢者霑被之亦足明朕之優言路矣何湛湛
之偏濃緣侃侃之猶在三旌奚新一謬斯難

太常寺少卿管光祿寺寺丞事鹿善繼

制曰粵稽周禮各有攸司韎師籥師以殷薦而
成豫共盥共鼎借大烹以觀頤惟五聲之方
開與六氣之既降欲還性情各得之正端賴
清明在躬之人毋曰德輶乃為職鉅爾太常
寺少卿管光祿寺寺丞事鹿善繼稟道貌而
天行生今時而古侶方膺司膺欲散瓊林朽

蠹之藏既佐元樞遂參玉帳翰鈴之事靖共
爾位龜勉同心掇皮皆真惟願臣忠子孝獨
行不愧真堪立懦廉頑每為破壁之孔融力
護覆巢之趙盾精忱可通乎天帝何須博臨
下房忠信已格於豚魚豈難區分庶物宜任
曲臺之相更調大劔之羹見黯黑而頽長豈
但雲和撫瑟若沙鳴而盲眦慎毋蠹勺貽羞

此物理之的然非精心而莫辨至若填虜互
叶致神聽之和平甘苦互嘗仿思成之駿格
感人心形於聲也宰天下猶是肉乎庀爾攝
官良有微意茲用覃恩階爾為中憲大夫錫
之誥命自茲以往左簧右招無使餘音之噍
殺春羔秋犢罔留秩膳之膏脂宮既動而懸
宮難望羽商協奏水已甘而濟水更慮澗溜

易清余將發靈鼓之音爾母作勞薪之嘆
制曰世有植節負竒之彥秉仁蹈義之楨稱祭
酒于豐鄉推耆英于洛社千秋樹楷百行紉
蘭禮樂兵農罔非家政勲名節義總屬庭規
企想名賢可無揚厲爾累封承德郎兵部職
方清吏司主事鹿正乃太常寺少卿善繼之

父孝友吉人慨慷傑士橋依繡斧耻同年少
之烏衣困滿墨莊願附先民于青史感椿庭
而攀柏誰知藥鼎無功聯棣韡以榮荆猶喜
炊烟未散畏壘從彥方之化汪波敦叔度之
風梁案蒙塵温臺永閉論珪衮而璋影則貞
修發蘅芷之香至炙膽而鋼腸又俠烈吐虹
霓之劒夷氛正熾喜擲筆而請長纓黨猶方

張能舒翼而藏危卵是豈儉父之眇見堪為
汗簡之高談以此義方勉其明德今爾子官
留饗署班列容臺鼓簧而揖好德之英祝噫
而憲不怵之老欲維風則國無悖史幸論世
而家有嚴君使其皤髮朱顏爰借金章之色
庶令厖眉碧眼長操木鐸之權允為世儀堪
云人瑞茲封爾為中憲大夫太常寺少卿錫
之誥命垂衣畫象余方尋胥泐之遺黎良食
加餐爾尚保期頤之遐壽

太僕寺少卿孫之益

制曰昔有臨邛相如才名冠千古讀其文未嘗

無凌雲之思然其人不可以世網收也若林

間知有輪車使采四方之風雅通九州之異

同嚴遵賣卜成都與臣言忠與子言孝朕不

願得相如願得如問如遵者而適世焉爾太

僕寺少卿孫之益其鄉人也作令在文水之

濱徵拜入繡衣之署鷹鷂非衆禽可偶威震
松廳豺狼在當路宜驅風開蠶葉至若董蹇
政而煮海者盡徙其雀符握文衡而軼羣者
胥登于棧樸驄花到則兔窟皆空豹尾臨而
狐涎畢掃朝樹軒軒之采人驚嶽嶽之丰然
惟其性秉觚稜久注莽蜂之目迨至禰興鈞
黨遙聞信獒之聲問厥所繇豈自貽戚祇欲

使鱣堂毀而梁木摧鳳羽鍛而高岡寂躋蓮
豎以祀鼉宮奉遵堯而續麟史天下瞽瞍焚
琴莫所攸底朕欲牖性光于黜夜煽皇路之
腥塵採其佚賢坻我周道非爾也將安取之
茲用覃恩階爾為中憲大夫錫之誥命於戲
南交指冰困為北北陸號暘谷為南其相訾
也乃其相標也昔之申申而詈汝者正其津

津而頌女禫琴御矣猶欲賞肅爽之肆不共
輜車遙發而問出處于簾下之人哉

翰林院簡討徐沂

勅曰朕嘗循覽官方至於史職輒衰哀愾悼也
孤進從遠方來給尚方筆札為起草臣恩遇
沃矣國家何私厚焉搜討朝章叅綜往牒以
備異日論思上選其視它曹職逾重心宜逾
苦今豈無雍頌被服甚都而蚶封髹几蠹窟
縹緗者虜匪藉殊英孰標重望爾翰林院簡

討徐汧素推東箭今備西清鳳字龍章總乙
夜寒灰畫就鵬飛鱣躍亦丁年和膽教成子
觀李密之陳情頗悉徐陵之家世瑤蓼應歸
蓬閣尚分諷背之芳琪樹已植奠堦猶念棘
心之苦維才華本於節義知非吸露春葩若
忠孝結為性情可許凌霜冬翠况爾聲名之
藉甚頗聞器識之淵如杜德有如木鷄惟恐

香薰膏焰隱身儼同霧豹佇須風冽雲興握
槩持鉛耻作甘泉之賦鈞玄提要願窺石室
之書從此廓其三長終當成其五志夫使史
局罔嫻史事文苑不習文章為行秘而尚鮮
壯堂之抄將變調而終抱南華之媿於居官
何為守畔恐有識嘆其不觚翳爾弘才可免
茲誚茲用覃恩階爾為徵仕郎錫之勅命昔

在

神宗時有魏科就館三年無一日之曠
世廟中更有同年文酒相高屏謝不預惟矻矻
於經濟者其人操尚勲伐不同然皆後進之
師也瑀華鞶飾在志士猶為瑣務若并瑀鞶
不修而漫謂月殿崇嚴淵圖秘邃以驕語鞶
掌畫瘁葦子未許以為然聊借贊詞風諸譽

彥

母

勅曰王者以節義治天下則上自簪笏下迨綦
縞皆不以安危存亡貳其心詩咏髣髴而興
以汎彼正言靡定也定于儀定于特人心定
而天下定故庶婦可以基化焉爾旌表節婦
朱氏乃翰林院簡討徐沂之母爾子曾為瀝

奏予亦得之采風蓋其生自名門習聞女誠
本待絲牽郭幙豈期鏡下溫臺而刀尺每雜
以芸編繁絲不離乎湘管璣囊角勝錦字爭
竒既丹穴之呈苞忽素幃之懸旒若使壞墻
不返誰成四月之孤惟有同穴要盟可定百
年之義哀鷦作賦更憐乳燕啾啾寡鷓成吟
安得鷓雛噦噦從此飲食方名之教莫非詩

書俎豆之規原其賦性維均七鴟本同勞愛
烏知鍾靈不爽一鷓早見騰飛當年寂寞繁
燈靜掩宣文之帳此際輝煌銀版喧傳行義
之間天上麟兒已作人間竒瑞懷中鵠卵仍
令泉下增輝子方拜表而陳詞予亦感懷而
興嘆至若繽紛蔚采似得椒花絮柳之竒端
謹矜修顏協母師女宗之範潯陽卻鮓何妨

繪出蓬池穎谷遺羹更可莖分僊掌有懷聖
善不厭稠加茲用覃恩封爾為太孺人錫之
勅命昔蘇易簡佩禮讓之訓御座爭榮賈黃
中因品藻之精奎章斯賁惟名臣必推所自
故賢毋多被其光予何靳焉是在爾子

禮科都給事中孫紹統

勅曰國家以六垣配六曹固以耳目配股肱也

今九儀綿蕞五禮絲棼朕雖欲獨謹惇庸協
于時敘厥道無繇爾禮科都給事中孫紹統
風神肅爽識量端明一自廷掄三綰邑綬懋
著循良之譽旋躋獻替之司爾乃諤諤直聲
亭亭勁節排雲叩闥思外不出于思居揭日

陳謨自獻必先于自靖爰被逆貂之摧折益
徵威鳳之翱翔既復言坡遂登諫長念邊陲
之多故則禮闈似屬優閒然朝著之紛紜覺
民志猶多陂側朕之淬礪豈任翫骸而事以
蠱壞難收人從渙弛未振必使政令皆無雜
出散神叢于諭訛之中前後罔非正人消煬
竄于與突之際對青陽以培元善風蒙共賜

僭而俱消服倉玉以召陽和臆霾與雰雰而
金化自古宰鉉燮調之事即繫春垣奏對之
條如爾履潔以含忠允稱塞違而昭德是用
覃恩階爾為文林郎錫之勅命於戲丹青一
代如衣黼黻以驅寒明白百王猶飽膏粱而
疋疾不僭不濫乃堪和上下而治神人惟寅
惟清庶可經國家而定社稷佇望遠猷而辰

告用標遺直以申褒

禮科給事中張鏡心

勅曰昔漢張普惠作司諫任城王澄謂之曰不
喜君得諫議喜諫議得君耳唐張方回抗疏
朝政精神昂然玄宗稱其為忠此皆諫垣美
談在孝友之裔則傳家故事也爾禮科給事
中張鏡心金石礪躬冰霜剝骨花封三仕單
車清比姑臧茂宰五年慈父惠同長葛遂以

治平之上選作予禁闈之親臣茲受事數月
耳碧枝未冉阜囊屢騰鐵補闕聲震梓彈緊
拾遺忠舍獻替方烏烏集升平之第猶白馬
入光武之朝今庶事履躋渺躬抱惕莽有戎
而玄黃未息煬在竈則蒼素難分非資斷鞅
之臣曷副懸轡之意况乎班聯錦繡紙賜牋
藤韓魏公七十餘章不妨頻頻白副趙忠簡

三十六事何難一一朱銷常令日映丹心乃
見風生青瑣毋戒心于仗馬之斥共看去烏
啣環第和衷為鳴鸞之求終令遊魚得水借
爾侃直開我巨鄰茲用覃恩改授徵仕郎錫
之勅命昔唐臣白居易之言曰諫臣之選甚
重而秩甚卑重選者使下不忍負心上不忍
負恩也卑秩者使位不足惜身未足愛也余

聞此語唯恐崇獎之未至無以發謇諤之氣
雖然爾豪傑也詎待文王興哉

河南道監察御史羅萬爵

勅曰自古佐綱紀掌治令職在侍御史又謂之

殿中監察匪耳目人無已也凜天監于下房

資冥察于觀火仰配二曜俯矚萬形尋名繹

義厥功懋焉以表樹丰稜磨切貴近駁寒暮

是賴爾河南道監察御史羅萬爵吐江淹五

色之花製尹何七襄之錦素琴流韻春生朝

漢之臺廉石路裝秋滿沉香之浦脫巡方于
虎口足徵應猝長材鎮海寇于鯨波何啻解
繩雄畧比膺華選僅寘留都祇因嶙嶙屈軼
嶽嶽神羊不生烏喙之林詎入黃顰之隊雖
挽回力詘苦沸鼎之難調而消弭功深亦林
柯之稍靜比其久居剪芊漸屆禫琴攀栢之
淚稍乾傾葵之忠欲吐橫榻于鐵柱之下蠶

葉風開珥筆在玉陛之旁麝條霜勁兩地官
居冷峭惟北闕亦號南床百僚人羨峻雄以
西臺遙連東壁若其規陳而諷議每寓正直
於和平當路狷狷不辭碎首之節高崗奉奉
何須合口之椒賴爾貞臣翼我皇路茲以今
官仍階文林郎錫之勅命嗚呼地繇人重位
與道尊必使仗劔橫車致藜藿之罷採更期

舉鞭聳揖斷輦轂之驚塵朕且委心聽爾司
直

吏部考功清吏司郎中孫必顯

制曰國家非乏才是患也得一用人之人以澄
空之識鏡羣品而以珎護之念收衆長則十
步之內必有芳草豈操倅斤于鄧林而鮮搏
櫪之用爾吏部考功清吏司郎中孫必顯厚
自天植夙稟庭規鳧駢橫空迷離莫眩其視
溜滲入口斟酌必窮其源乃懿好永托于椒

蘭而坦衷淨掃夫籬棘清無溪刻冰壺藏瑾
瑜之溫正不離畸坻道絕欽崎之路轉因一
時之摧折養成四氣之中和既長功司玉衡
儼齊乎周尺將膺典選金鏡吐曜于秦臺原
其澄汰方嚴祇欲斥回而昭德若其崇獎不
勸罔非登明而選公念

上帝降材之殊雖蕭艾與蕘施雜植體一人求

士之切則參苓與漉漉兼收豈獨廓展錯之
門抑以開蕩平之漸人皆競奮實惟女庸茲
用昨歲覃恩晉勲階為奉政大夫修正庶尹
錫之誥命夫以邊陲多故令人各循其職此
振裘而未挈其領者也周禮天官舉邦治若
軍旅若斂弛六聯中次第受成焉選擇弗慎
賈墜厥事以貽廟社羞當質之官人者予特

簡女以相統均匪徒瑾倖竇室旁蹊更欲張
八面之宜致竒才異能備國家緩急於爾是
賴爾其懋哉

妻

制曰古有貞臣必有良配正如倉庚鳴春蟋蟀
唵秋亦各從其類也然有春條方燁木槿蚤
凋秋露未凝芄蒲豫謝氣類相感或完或闕

參差不齊撫茲悼嘆爾累贈安人張氏迺史
部考功清吏司郎中孫必顯之妻佩箴管以
承素絲執棗修而事青瑣幽閑女士自有東
海之風肅穆如賓寧聞北門之嘆豈意穆天
之黃駟方指日昂驤而王母之青鸞先隨風
萎落今爾夫已游歷顯晦馴致清華追憶朱
顏悅睹鳴梭之伴傷心白首誰當合劔之期

雖窺瘡有人山濤不乏借鑑而悼亡無補潘
岳所以啣悲朕方倚重夫銓臣可不馳恩于
元配茲贈爾為宜人錫之誥命念爾夫職司
功者亦嘗聿稽婦功乎雖有絲麻無廢管蒯
故慶多興悲靡蕪致咏皆傷人心之薄而初
終睚置也今為子大夫諄諄道故雖曰彝典
亦藉以風世焉

制曰士有砥躬事主勵束修之節植簠簋之修
者此其家必有淑配焉若二三罔極多女德
使然所從來遠矣爾累封安人景氏乃吏部
考功清吏司郎中孫必顯之繼妻爾之家教
與其壺儀豈能執彤史而問之但爾夫自歷
計曹以叅銓選當虐燄熏炙之時何以恬不
為惕迨膺仕濟登之會何以漠無所疚想宵

燈之對語暨舉案之籌量在仕路險夷既有
迤坦嶮岨之別若家庾盈縮則有冰困金穴
之殊誰能樹此風規世其清白念士大夫而
絕門外苞苴之奉必兒女子亦鮮閨中刺促
之言人情固然非懸臆也朕振起官方肅清
銓政苟有同德佇望相成是用封爾為宜人
錫之誥命觀爾良人器宇祥風披而慶雲流

也即皦皦潔修而第祿有餘受焉爾雖以荆
布自將後福未可量也金鼓滿則量概之人
滿則天概之慎毋為天所概哉

父母

制曰世有直臣嶽嶽朝端欲伐邪剪佞還世道
于清寧而寒芒甫耀摧鋒破鏑雖剛大之氣
常熠煜星漢間迺鍾于後裔者彌篤已達前

人之志使紆者鬯死者存於人子有待焉爾
原任山東按察司僉事累贈奉政大夫孫振
基乃吏部考功清吏司郎中必顯之父當
神廟之中葉作瑣闥之近臣是時衆正彙升墳
麓不乏而羣陰角峙喧呶競起爾能樹貞良
之干壘作謇諤之螭孤豈特白簡凌霜抑且
丹衷揭日維

皇祖念明庭之屈軼有意滋培而時人憎當戶
之芳蘭首行鋤剪銷踪禁地分臬海邦遂使
白草原頭無復飛鷹之架紫宸仗內不聞立
馬之鳴世道等於逝波人材盡為隕籜念茲
往事可鑒來茲今爾子素秉庭規來司銓政
凡百年倚伏之機一代端衰之品不須旁求
夾袋應知蚤識瑤環昔李德裕云顯官須公

卿子弟為之少習其業目熟朝廷事不教而
自成語洵然矣亦顧其父何如耳名父有諫
草即考功之律令也是用覃恩仍贈爾為奉
政大夫改京銜為吏部考功清吏司郎中錫
之誥命念爾生平立朝日淺挾剝犀斷蛟之
才未試而遭缺折者豈非相刃相靡使然乎
夫矯矯直方猶易也无不利難矣即爾所望

于子者當昭前之令德而光大之豈徒曰青
箱之學在

制曰凡貶恩之典推及前母則至溥被已以為
成父志乎烏知為母志也同執筐筥以事良
人雖一室之中履分今古而百年之內情均
唱隨繁華寂寞彼此共之何間焉爾累贈宜
人劉氏乃吏部考功清吏司郎中孫必顯之

前母在盛年之佳耦宜沒首而永偕何芳草
先萎靜琴遽斷霜飛夏屋雪灑春郊爾夫振
蜀金閨爾猶作泉臺之笑爾子榮庭玉樹爾
則舍向隅之悲維物理之如斯嘆人情之不
遠若夫興懷舊事敝履空存步武芳規連枝
再接魚鰥鳳渴終念貧賤而重糟糠鵲巢鳩
居猶問諸姑而及伯姊則佳兒之遶膝爾所

同也豈譽命之被躬我有靳乎茲用覃恩仍
贈爾為宜人錫之誥命於戲愛以均愛明錫
類之無私親不獨親補化工之有憾臣下能
識此意母使胡越起于同室而畛域分為各
天則蕩平之化將必繇之
制曰五嶽並峙而金泥玉簡必歸于岱四瀆合
流而珠淵寶聚必出于海扶輿之氣固有獨

鍾已夫膚合而雲興孕奇而川媚德博而化
坤亦有之奈之何處無成之位代終而不居
也爾累贈宜人覃氏乃吏部考功清吏司郎
中孫必顯之母事夫子在隱見潛躍之交主
中閨似守先待後之會視明生之有爛梁案
方齊嘆未日之無多溫臺頓掩至若蘭畦醞
馥桂殿飄馨雖睹灼灼之華未飽離離之實

今爾子提衡握鏡辨官掄材凡在甄別之中
登籲之選莫不光分翟弟寵溢庭幃而護背
無依棘心自苦念此深情殊為寄悼茲用覃
恩仍贈爾為宜人錫之誥命夫爾既以夫貴
兼畀之子子又貴矣此所謂扶輿之獨鍾也
何以偏促其筭予之齒者去其角固以錯
綜而成造物若夫補其剝缺齊其修短此余

一人事爾子勉期令德余之慰爾者尚有在
制曰凡開國承家後者處逸然而食造物之報
者必其宅心溫惠潛與造物通又或夙生之
福植之有因非侂合也爾累封太宜人賈氏
乃吏部考功清吏司郎中孫必顯之繼母當
施衿結褵之初遽作省郎之嘉配暨奉幃駐
幃之地旋分岳牧之殊榮即儉素不脫縞綦

業見輝輝象服或勤勞時鳴梭織已聞歲歲
鸞聲孰是深閨企此竒邁至於一門堂構非
有口瘖手据之勞而再世光華兼有婦惠母
儀之報坊者悽其原草祇借紫泥以賁下泉
存者赫奕養堂方介緋衣而稱上壽何豐碩
之賈別詎施受之無章比簡閱絲綸頗聞仁

孝知

先皇之崇獎亦

上帝之博臨何憚巽申益昭晉錫是用覃恩仍
封爾為太宜人錫之誥命昔也麗卉春叢值
芳風之正煽今則彩雲秋漢又瑞日之再中
天豈私於一人爾自迓其百福

庶吏部文選清吏司員外郎陸康稷

制曰周禮有之施典於邦國而建其牧立其監

陳其殷置其輔是太宰之職上士得參焉故

在南宮為眉目在選士為司命宜遴髦雋以

分劇曹爾吏部文選清吏司員外郎陸康稷

朗邵取精英醇表物花疆異等曾翔兩地謳

歌粉署兼材亦拓五兵籌畧祗因省臺袞袞

耻分貂豎之榮所以人地錚錚獨擅鸞停之
譽而橫遭駮浪迹類飄蓬突遇狂飈官同隕
穉朕睠茲夙問仍屬提英方君子道長之時
又臣工濯磨之會爾能執心靜志羣私絕其
倖緣盟隱奉公衆正登于皇路望星辰而聽
履仰贊銓綜指風月以飛談恪分朝委未數
顏嗔謝咲已兼王簡裴通察爾佐選之清平

可稱邁時之明雅詳而不滯此時為遵度之
居唐舉無失才它日擬巨源之在晉茲用覃
恩階爾為奉直大夫錫之誥命於戲自運世
之漸移覺官人之多憾千蹊競進三窟爭營
時積薪嘆轉石之難拾艾渺連茹之望必欲痛
推競躁嚴杜黃緣定尺短寸長之材扶小往
大來之運以共邦治實惟望郎爾無媿焉余

將棟汝豐以共濟於實非望彼爾無歎言余
妻親如珠實然文入賦長身之懷非制
制曰風人有言龜勉同心心同者家之慶也顧
未易盡同其遇則有感結禱之舊事增遺履
之深悲者何以慰其私卹乎爾累贈安人申
氏乃吏部文選清吏司員外郎陸康稷之妻
鍾靈淑靜選則柔嘉侍藥親闈悲愴寸腸為

割聯恩涕如薰蘇同氣靡殊冷夜月于參橫
鳴聞刀尺儆明星之鳧雁婉爾絃琴雲霧未
蒸思豹變文明之運風雷自許耻牛衣涕泣
之時豈伐柯之則空存而食蔗之甘未逮比
冰壺之相對嘆梁筍之久空茲用覃恩贈爾
為宜人錫之誥命黃壚既耀紫綉重輝冊府
晴雲共被鑑衡之寵空山暮雨如聞環珮之

聲

制曰自古深閨之彥職惟隸于奎湘名不通于
里閨至於緬術徽音徬徨悼嘆則幸中有不
幸焉爾累贈安人于氏乃吏部文選清吏司
員外郎陸康稷繼妻德粹琮璜規芳胄閼嘗
擁篝燈而翼業又脫簪珥為資裝想其雪案
蠶鹽風塵書劒猶在三冬禦窮之際豈無千

里聚糧之勞戾戾朝炊目斷長安日遠刀環
曉夢腸迴宦邸星寒思縮地以無從愁城難
破比籲天而有效泉壤先歸至今畫繡之人
頻感夜臺之客豈因繼媿忘此中權茲用覃
恩贈爾為宜人錫之誥命鸞章載錫燕寢流
暉九京漸沉尚食天曹之福三星並粲宜思
閨位之功

制曰士之爽德媿在參微故有識曙徇福之先
明洞亨屯之表者即才詰難之况女士乎爾
累封安人吳氏乃吏部文選清吏司員外郎
陸康稷繼妻壺史湛精香帷濯秀柯垂葛附
昂參散彩于露階莖蔭繁生芝玉叢芳于雲
砌豈特恩均卵鵠屬離無毛裏之分尤能孝
比慈烏服勤供修灑之職故使蘭陔載咏潘

岳扶持以行園亦令萱背忘憂王導指麾而
就道奴氛羽扇每懷汪錡之忠璫綯鈎連亦
抱威明之耻孰云中巾幗不迨鬚眉乃若去國
則偕隱尋盟徵還則留身代饋婦能如是臣
何幸與茲用覃恩封爾為宜人錫之詰命蓋
思攬其金鏡堪資月旦之評更欲殫厥冰心
仰媿天卿之佐想青閨之正茂毋替鷄鳴迓

朱紱于方來聿新象服

父母

制曰朕逖稽往牒漢伏氏相襲為名儒以取爵
位陳氏累葉公卿太丘疏其源耳即吳中四
姓閩閩非以朱輪貴以青箱貴也爾累封承
德郎兵部
清吏司主事陸特賓乃吏部
文選清吏司員外郎康稷之父聲華濟美雋

軌舒翹世學淵源代有生花之管才華映帶
人嘉濯柳之標揚赤幟于干英共駭文鋒淬
礪抱素絲之一縷猶餘俠骨嶙峋怨婦啼粧
終亢杜回之草悽魂泣背遂傾范氏之舟豈
藉滿羸乃能心懷緩急自憐垂橐亦常誼篤
解推所以數竒感櫪下之嘶善慶騰渥注之
產崔家三戟未能響振金貂楊子一床旋見

先生琪樹既賴韋莊之餘教儒術傳經頗類
謝朓之相承鑑衡接武茲以覃恩封爾奉直
大夫文選清吏司員外郎錫之誥命於戲尋
漢江之崇望窮杞梓之發聲理若弓張報猶
谷應若知定省相送傾朝不關於尚之更如
里巷遨遊要津思避乎顏竣益勵達人曠致
轉增名士風流佇爾芳規砥茲末俗

制曰玉水方流璇源圓折所托必異况國禎世
寶豈無自乎如韓伯康為文部首舉吳隱之
其母實啓焉孰謂聖善令德於人材進退無
與也爾累封安人盛氏乃吏部文選清吏司
員外郎陸康稷之母芝蘭至性鐘鼎名宗恪
伴藜藜協珩璜于圖史躬勞蠶月儼綦縞于
衿鞶滿懷畫屬慈祥終身罔聞叱咤每問居

官消息喜元暉貧乏難存念其良食加餐因
不疑平反無滯樂陳四部奉潘御于輕軒命
錫三加祝趙母之眉壽茲用覃恩封爾為宜
人錫之誥命知爾夫五車蘊藉未酬警枕之
勞因汝子六典精詳少慰捋荼之苦絲綸賁
色婺纏借金鑑以增光珈弟重輝露掌共瑤
墀而哀潤

吏部文選清吏司主事喬若雯

勅曰朕惟銓管之任勞同繭絲謁選之人次若
鱗集室倖竇豁滯津典劇要務也然此猶其
小者採梗楠以肩崇厦掃籬棘以闢周行分
拔茅泰否之關乃提衡綱維之大爾吏部文
選清吏司主事喬若雯擢第增祭戟家聲拜
官得絲綸美秩班推玉笋乃以蘭畹而謝桃

蹊地傍金閨肯就冰廳而辭腸谷即此片時
之枯苑足占素履之端方此覩見而雪消猶
霧瀾而霧障爾能吐乾坤鬱結之氣洗諧媚
腥穢之風以此望重南宮清香豈留其澄澹
既號人倫東國明鏡宜用以紵銓憶當年噦
噦朝陽雅擅九流品藻宜此時悠悠月旦共
稱六典廉平第季女初事尊嫜芘莢未適迨

庶婦肩隨娣姒莞鑰徐關而今任議攸分勝
負相犄宜秉憂國憐才之念務合人情政體
之公若味既判于淄澠功必資于烹飪爾既
饒有正骨遇潰瀾而伸激汰之權更願殫厥
苦心蘄調琴而發和平之響若夫朱書絕迹
石紀無功在昔稱能於今為細茲用覃恩仍
階爾為承德郎錫之勅命昔山濤啓事曰吏

部郎典碎事非但正己貴在正人而
先朝名文選林春有言曰選曹之職欲上通君
相與冢宰之心下通選人與天下人之心居
其間欲兩合焉難矣此格言也借我勗勉之
鸞文共作賓僚之龜鑑

吏部考功清吏司主事楊伸

勅曰昔考課始于京房後有九等四善二十七
最主羣吏之課而議其誅賞總不出六廉遺
意也徇以木鐸各修乃職攷乃瀆待乃事以
聽王命故曰郎于天臺任屬尤重焉爾吏部
考功清吏司主事楊伸本臨邛詞賦之材叅
度支出入之計殫厥機晤算鞭可代牙籌試

以征輸轉著堪知玉粒望郎已禪乎計相英
鑒允協于銓衡惟涇渭之攸分臣心似水更
棘籬之盡化其臭如蘭風月宵深高談遠期
世外褰帷日暮俗駕敢向門前至若弘濟時
艱講求亂畧願同守埤乘城之士驗其飛雲
叱石之竒何濡手而不辭祇憂心之孔亟思
以愧骨戰宵春之輩更耻為旁觀袖手之夫

朕正欲詢事程能尋名課實借樽櫨以支大
厦渡溟渤而藉長丰考功於論功行賞之時
旂常自有彝典求功於大功未集之會夾袋
尤當豫儲咨爾鶴廳奉為鴻寶茲用覃恩仍
階爾承德郎錫之勅命又嘗稽爾官在六朝
為功論郎功論者即公論所敢奮也今悠悠
清議得毋有鬱而未舒者乎渺躬不逮烏能

耳目人無已也更資綜覈之公用佐昭明之
化
勅曰哲人賈地付纂述于紹庭正學麗天發晶
輝于肯構惟名儒德居潛躍俎豆生光瞻望
郎績邁清通弓裘食報龍文肆霈燕翼丕昭
爾贈承德郎戶部江西清吏司主事楊守敬

乃吏部考功清吏司主事伸之父覺遯先民
志敦皇古才峯萃筆宛如雪霽峨嵋思海汗
洵更類雲開巫峽而採風陳雅通土俗乎輜
車敦孝作忠挽頽綱于卜肆孀姊夫共姜之
節貞緣義成嫡母祝崔氏之昌慈繇誠感力
謝扶風絳帳即鮒涸無藉相濡共傳江左青
箱惟鳳毛可占濟美講堂魚躍伯起應三公

之祥穉齒龍文遵彥符千里之識此俱爾家
故事總繇世德綿延雖爾學不逢年有漏網
珊瑚之嘆而子時能善器作明堂盥盥之珎
至觀禴祀于瞽宗益顯梓桑之懿好若金鏡
擅人倫之譽亦玉成得庭誨之功茲用覃恩
仍贈爾為承德郎吏部考功清吏司主事錫
之誥命白鶴蛻去尚有胡安講學之壇丹鳳

卸來幸無相如封禪之草幽綸既煥明德斯
彰

吏部驗封清吏司主事王杼

勅曰昔晉文公作執秩以正其官釋者謂之主

爵至唐而更主爵曰司封掌邦之封典自宋

迄今無改焉夫五等既不輕議所主者惟階

級贈封而銓敘不與聞是空秩也何執之為

然白虎通云空猶主之况於實乎洵可味已

爾吏部驗封清吏司主事王杼以中原振起

之英作海邦循良之冠時徵書既下而逆談
方張肯蘭蕙而居敗棘之叢詎鴛雛而甘腐
鼠之嚇揮手津要戢羽留銓瀏覽于佳麗江
山痠心在平陂世運雖徘徊南署金鏡空懸
而端坐西齋冰心獨湛至祥琴之既御值化
瑟之方新暫主司禋旋登典劇視張續則喉
舌未晚比韋涉而眉目初舒然魚鱗比接之

班類燕羽差池之象而爾人推明雅物號廉
平茲望郎已發杞梓之聲豈清士獨標海岱
之目昨居勲府之右闈曙若列星今典封事
之左曹判同流水它日爬搔垢府將致令史
設齋使之疏淪名流豈聞孤官怨響如爾器
識繫賴銓綜茲用覃恩仍授爾為承德郎錫
之誥命咨爾天官之屬得徵以封司為閑局

耶當四五年前沐猴滿朝爛羊塞路至于席
紫貂之寵犯白馬之盟而恬不知忌皆封司
之失守也以功以庸懋官懋賞自有三章在
朕方以官擇人爾當為朕守法

戶部江西清吏司主事管理新餉陳觀陽

勅曰民曹按版圖而辨九穀一心計之士饒為
之蓋國有成法綜緒未難也自東隅靡寧亟
食無已專曹聿始建置欲恢恢遊刃豈止強
力計智之選爾戶部江西清吏司主事陳觀
陽天材秀邁世脉端醇雕藻可擬鸞文蚤擢
英于兩榜通經身居虎觀儼振鐸乎羣材儒

雅風華倬爾金相之度簡凝詳恪堪膺玉府
之司聊借舊京之師模來操新儲之筦鑰爾
乃棼絲悉理脂潤無濡數可投鞭寧俟牙籌
層算心同止水宛然氷鑑持衡聚米而知耗
登濟變可齊于馮勒轉箸以占盈縮握竒殆
過于張蒼豈曰材臣實惟國器茲以覃恩階
爾為承德郎錫之勅命夫理天下之大計猶

周身然人謂天狼未射寧知澤雁頻呼養潰
癰而剗肌理有識者所颺颺而慮也况爾生
長江南亦知民力之將殫乎宜砭膏肓無圖
肩睫

父

勅曰古之教者家塾黨庠即夏楚收威亦昔人
所不廢也世道交喪而貫弓飲矢之禍起于

樞衣納屨之間何意清時有此異釁幸立庭
之伏已雪更式穀之報宜伸爾贈登仕郎國
子監助教陳肖乃戶部江西清吏司主事觀
陽之父少為江左名流長號諸生祭酒青箱
再世知渥產自有龍文絳帳一經異蛾子尚
為鵠卵豈期臬羨薦食徒托歸夢于墻東共
驚鱸幄沉寃祗咽潮聲于江北黃雲漠漠張

禹空絲竹之堂白月荒荒玉通撤河汾之席
何間世之逆豎乃鍾禍于吉人人皆怒髮衝
冠欲正三章之法彼猶穿墉伏竇難令百足
之僵比後賢射策彤墀隨鷺飛于漢陛乃孝
子鳴號丹闕灑鵲血于秦庭此一家搶地之
哀實萬古敷天之恨茲餘孽已粉消犴狴稍
酬薪膽于當年而家學又香滿縹緗更慰丹

鉛于在日信常理之刻券洵天道之張弓茲
用覃恩贈爾為承德郎戶部江西清吏司主
事錫之勅命楓宸之寵渥維新松壠之悲憂
勿再出歎貧休東泚戰國當乘下其悲之
武太主三章之義如餘家徽外寶樂今可
何問之也
禮部祠祭清吏司主事劉繼吳

勅曰周禮大宗伯掌建邦之天神人鬼以佐王
建保邦國若禋祀若禋燎若血祭狸沈鬻辜
之屬肆師佐之典至重焉非珪璋其德滌濯
清明者無以承一人之居歆予茲嗣服嚴事

上帝

祖考凡在祠曹思慎厥選爾禮部祠祭清吏司

主事劉繼吳德宇深厚吏治精詳繡綵堂前
尚著飛鳧之蹟藏書洞口爭傳馴雉之謠以
此精白承庥堪備寅清上佐朕袞除熏腐肅
稟齋明秉蒼壁而精徹紫霄執黃琮而忱歸
玄壤若鳧趨奉盥之士駿奔執豆之臣必斲
瑩澈冰壺芬滋蘭畹薑薑素飭當官惟酌水
之清形影無慙閨室有焚香之告庶可陟降

左右豈獨奔走後先繫爾端派堪茲清秩茲
覃恩階爾為承德郎錫之勅命夫國家六官
並建原無低昂至於祠司固華貫亦鉅任也
詩不云乎自郊徂宮上下奠座惟爾乎主之
使神降而祗格風雨節寒暑時貽我來牟帝
命率育則輔理成化在百司之先煌煌簡在
人孰能先女

工部虞衡清吏司主事督理杭州抽分黎

黎元寬

勅曰周禮山虞掌山林澤虞掌國澤所以遂嘉

生制漁畋也至唐號閒簡無事宋用司田兼

攝幾備員矣國家有椎木之制豫章梗梓浮

錢唐而下者設關武林以一部署董之又為

冬官劇職焉爾工部虞衡清吏司主事黎元

寬負曠世之才稱名父之子當其形埤既對
國門甫懸文物歲雜聲名葱蒨何碧籟蒼珮
未借藜燃而木屑竹頭乃需蘭握雖論器者
轉稱其恬養而憐才者共惜其違宜爾則以
澄澗不動之波觀麤細同倫之妙心研藝事
身佩工箴敢言鸞鳳不棲第求鳥獸咸若至
若班聯水部便當官閣尋梅其奈人似眉山

行復長堤問柳佐起曹之匱何妨掇班管而
唱牙籌聞行旅之謠惟有借冰心以持玉尺
若六橋春滿復尋雪斃于孤山三竺秋深更
問風簧于鷺嶺湖中公事不嫌皂纛朱轡物
外遊踪尚借錦心繡筆豈爾風流嘯傲皆余
黼黻文章茲用覃恩階爾為承德郎錫之勅
命念郎闡之錦被釐奏百工即道岸之蓬山

望高羣雅堪灑玉階之淚何誇粉署之妍歷
軼方新升華伊邇

父

制曰在昔言路摧殘莫如車下獄學齋未解
定陵中葉或青蒲涕雨遂鋤屈軼之條或白簡
凌霜頓截神羊之角似秋風之振籜一葉蓬
飄嘆明月之無枝五雲夢斷迨徵書空付之

宿草而齋志徒抱于坏丘惟令緒之代興永
前人而未歿爾原任禮科右給事中贈光祿
寺少卿黎道炤乃工部虞衡清吏司主事元
寬之父入自南州穎豎名同北闕高懸因花
封得衆母之稱故柳篋應夕郎之拜爾則皂
囊屢獻青甌頻投殷侑八十四通何待月需
諫紙魏徵三百餘奏豈煩日赴內朝若其繪

鄭俠之畫圖效溫叟之封識人皆頌美非爾
所難獨其惓惓碧鏤之題耿耿青陽之位以
茲頻數頗犯

宸嚴遂借事以褫鞶竟歸田而沒牖方其衣從
蕙帶不談溫室椒塗并其藁落藤箋多付秦
灰魯壁也黃土還纏傳尾雙星業禪青箱
復見于門駟馬出渥水而驤步頻迴上斗之

坡辭丹穴以奉鳴還顧生梧之掖豈獨踐水
衡之署孤映臣心終當礪金石之操遙成先
志茲用覃恩進爾為奉政大夫錫之誥命嗚
呼是父是子乃柳氏名教之傳以熾以昌此
楊家靖恭之第代昭綸縉人念箕裘

南京兵部車駕清吏司員外郎李衷純
制曰周禮夏官有輿司馬及戎右趣馬之屬皆
所以奉王之五輅也至魏晉始設駕部郎歷
世仍之

昭代兩都金峙豐鎬間杳不聞警蹕聲然士有
塞淵若真采齊若度者廼守此官無濫畀焉
爾南京兵部車駕清吏司員外郎李衷純正

骨嶙峋高風肅穆豈特舉旗而靡潘陸之壘
抑可抗手而登冉閔之堂念丈夫自有階梯
而豪傑迥越嘗調鷄棲笑鳳彼何知焉牛鼎
烹鷄爾所願也故能搜精吏事洞悉民瘼剡
薦共卓魯以相方月旦註臺垣而無愧屬黃
顰吠嗥之世非翠鳳儀舞之年抑置水衡分
司蕪署而水壺夜皎清浮牛渚之淵玉尺春

溫驩動蝶磯之石朕茲嗣服旁採輿評知留
樞鑠鑰攸關而輿司水陸共縮如崔元亮之
清謹介特與辛公義之奉國竭忠維爾其人
可庀茲簡適狡酋之猖熾致白門之震驚而
能挾纊投醪效前將軍之聲潛刀斗簡卒蒐
乘猶新太尉之色動旌旗所謂文武兼資安
危繫賴者矣茲用覃恩階爾為奉政大夫錫

之誥命朕以國家多事破格用人乙科建牙
者同時有四如爾猷畧雅稱厥儔益濟爾才
鋒儲而德載以備不次選擢母謂用人者如
衿有幅耕有畔也庶母負鼓舞至意

光祿寺珎羞署監事瞿式耒父

制曰世有俗情所侈艷而志士愀然不怡者廕
與封是也使子以父顯父又以子顯兩受其
福而居身于亡何有之鄉非稔睹記烏知其
生平何如也爾太僕寺少卿致仕瞿汝稷乃
禮部尚書謚文懿之子令光祿寺珎羞署監
事式耒之父文懿以文章妙天下經生家褒

拜而禰事之緊爾才豈不自肖其禰然盱衡
今古似獨有意李文饒蓋豪傑固不必避任
子而尚用科目奮繇科目者從澹雲薄靄透
晶月之輝綦易任子則蓓蕾含芽生于藟石
之下非迅雷怒起不能劇地而出一出而行
路爭躡之即瑤簪珠英茂自見矣文學惟爾
志行惟爾負經世出人懋著勞勩惟爾二百

年來推世胄第一非爾而誰其官最尊者為
平津之子炎炎炙手旋致顛蹶勿論即

世廟初以議禮驟貴獵卿貳亦傭中佼佼也視
爾不夏若蕭蘭哉今復以子之餘榮而賁之
泉臺且齒冷焉然子亦文雅有祖父風以子
馳父於父無加而子志可憫也用階爾為中
憲大夫如子請夫爾子典外饗矣以貳郎自

振拔較任子倍苦世方以若輩為膺為毳羶
為赤股而躁鱗色而沙鳴烏知其續續而鳳
苞雖離而鸞噦世母以一切格格天下士哉

詹事府錄事王鑑父

勅曰朕攷昭代名臣祖孫父子項背相望牙笏
滿床榮戟森樹者屈指不數家而王氏更以
文章位望與典午之季後先輝映能紹休勿
替衍及後昆者榮施寧有靳焉爾王瑞庭乃
詹事府錄事鑑之父稽爾譜系蔚為物華萃
代興之偉人作世惠之嗣武無論一門七貴

尚多崛起之慙即有四世五公未擬聲名之
盛正恐烏衣之成習以致青箱之失傳俗染
豪奢鬼多高明之瞰人爭汰侈天有虧盈之
幾環轉無端弓張不爽計爾於祖父謝世之
後豈獨無家門墜緒之憂猶賴琳琅肇其弓
冶追念綿綿蟬翼僅留屋上之烏幸此輝輝
鳳毛故是堂前之燕墨莊仍在滿籥猶貯乎

遺經丹券具存半通可延夫世賞朝廷聿昭
明德既因先世以及曾孫覃慶溥被恩章又
因令子而推厥父從此盈庭緋紫瞻素旒以
生風并令挿架縹緗借紫泥而動色特准爾
子所請移封爾為登仕佐郎詹事府錄事錫
之勅命於戲義方弗納于邪子既承夫家教
世祿鮮克繇禮爾益懋厥身修美蔭方繁喬

木正永

整飭紫荆等關保定兵備山東按察司副使沈蔡

制曰朕惟上谷漁陽東西屏蔽以護神京漁陽之鞏鼓動而圻輔卑寒建牙重臣又提兵駐近郊以備兵使者攝填撫事猶節度之有留後權綦重已爾整飭紫荆等關保定兵備山東按察司副使沈蔡賦材凝厚稟質沉涵望

之土木形骸得紀消養鷄之術叩之江河傾
瀉類王猛捫蝨之談始佐起曹補賈鼂之末
議繼參樞幕佐韓范之前籌固可以悉護諸
軍肆疇上宰何以葛藟他人之嘆遽遭芳蘭
當戶之除朕博訪宏猷敦尚悃幅念悠悠坐
談之客祇同畫餅充饑必恢恢幹濟之才庶
可泥丸封谷授爾以魚鑰虎符之寄置爾于

飛狐倒馬之間本欲餌制西酋豈意烽傳東
虜而能作節旄之後勁樹犄角之先聲雖玉
帳未開而金城倚重邊庭擾擾五陵安堵依
然易水瀾瀾三輔驚波不作匪藉晉錫曷慰
師貞茲用覃恩階爾中憲大夫錫之誥命夫
遼亡而左臂失至遵永淪於腥羶浸浸寒及
肩背矣昔虞允文開幕興元旌壇所揮軍民

歸附夫非一書生哉惜所進攻守策宋室不
能用也若予則佇聞之

河南開封府祥符縣知縣宋琮

勅曰宦成而錫之命者贊典也著仕而寵之言

者箴詞也有名家子以宏材博學擢制科為

余中土作劇邑令余聞之心擣焉微爾以覃

慶請也固將勗女咨爾河南開封府祥符縣


知縣宋琮爾令也令則若保媪然提嬰孺于

母之懷中嘯嘻揣焉燥濕均焉繪祿錫飴之

是匿而以水火糜潰必大降罰即弗稔于氣
聽時其癢苛而抑搔之使呱呱無輟聲馴乃
瘥札罔有療令過也爾中土令也令中土者
實函斯活尚未綿綿其庶豕蠹蠹嗜嚙薦食披
根攘之剔之繫令事否乃身為司稼而不辨
種稂誰之永號至弗可貫令過也爾固名家
子嫻于文文成粹試為令者也穉女胸縮隱

帷幕蔽人自匿即姆教婉婉聽從亦織紵組
紉止耳惠之尤者佚而墮籥簫簾篴變而彤管
浸假而好濫淫志五飴酒漿生而嫺焉寡矣
執棗栗段修以贄饘醢芣羹唯所欲鮮不遺
惟令之履疆猶是大吏用睨頷示旨嘉石左
肺石右錯立族談莫能衡其一直令過也女
母麗此三者是則循令余則顯庸女今用為

汝勛命司封氏階女文林郎實覃厥施非格
也以女材堪此令且聿觀厥成



書